



Anders Olsen
Inatsisinut Ataatsimiititaliap siulittaasua

Asasakka Inatsisinut Ataatsimiititaliamut ilaasortat

Naalakkersuisut Inatsisinut Ataatsimiititaliap: Ingerlatseqatigiiffiit Kalaallit Nunaannilu oqartussaasut whistleblowereqarnissamut aaqqissuussinissamut (kinaassutsimik ersersitsisuunngitsumik ilisimasamik ingerlatitseeqqiisinnaanermut periarfissiisumik) malittarisassiuunneqarnissaannut Naalakkersuisut peqquneqarnissaannut Inatsisartut aalajangiiffigisassaattut siunnersuummik, UKA 2015/117-imik, suliaqarnerminut atatillugu apeqqutigisimasaanut qujapput.

02-11-2015
Suliap nr. 2015-14538
Allak. nr. 5173226

P. O. Box 1037
3900 Nuuk
Oqarasuaat +299 34 50 00
Nassitsigasuaat (+299) 34 63
50
E-mail: oed@nanoq.gl
www.naalakkersuisut.gl

Apeqqutigisasi taakkunungalugu akissutit tullinguuttuni takuneqarsinnaapput:

1. Naalakkersuisut paasinninnerat malillugu pisortat nalunaarsuivii pillugit inatsit maanna atuuttoq (Lov nr. 294 af 8. juni 1978 om offentlige registre) kinaassutsimik ersersitsisuunngitsumik ilisimasamik ingerlatitseeqqiisinnaanermut aaqqissuussamik pisortat ingerlatsiviini pilersitsisinnaanermut arlaatigut akornuseeqqava imaluunniit killileeqqava?

Naalakkersuisut isumaqarput maannakkut nalunaarsuisarnermut inatsit (pisortat nalunaarsuisarfii pillugit inatsit nr. 294, 8. juni 1978-imeersoq) Kalaallit Nunaanni oqartussaasunut whistleblowerimik aaqqissuussinerit pilersinneqarnissaannut akornutissaanngitsoq killiliisuunaniluunniit. Nalunaarsuiffeqarnermut inatsisip Kalaallit Nunaanni oqartussaasut whistleblowerimik aaqqissuussinernik pilersitsisinnaanerat arlaatigut ajornakusuulersissinnaavaa, sianiginiagassammi arlaqarmata. Ilaatigut nalunaarsuiffeqarnermut tunaartarisassat pillugit Danmarkimi Datatilsynimit oqaaseqaateqartoqarsimassaaq.

2. Naalakkersuisut paasinninnerat malillugu namminersorlutik ingerlatsisut pillugit nalunaarsuiviit pillugit inatsit maanna atuuttoq (Lov nr. 293 af 8. juni 1978 om private registre) kinaassutsimik ersersitsisuunngitsumik ilisimasamik ingerlatitseeqqiisinnaanermut aaqqissuussamik nunatsinni suliffeqarfinnut pilersitsisinnaanermut arlaatigut akornuseeqqava imaluunniit killileeqqava?

Naalakkersuisut isumaqarput maannakkut nalunaarsuisarnermut inatsit (namminersortut nalunaarsuisarfii pillugit inatsit nr. 293, 8. juni 1978-imeersoq) Kalaallit Nunaanni oqartussaasunut whistleblowerimik aaqqissuussinerit pilersinneqarnissaannut akornutissaanngitsoq killiliisuunaniluunniit. Nalunaarsuiffeqarnermut inatsisip Kalaallit Nunaanni suliffeqarfiit whistleblowerimik aaqqissuussinernik pilersitsisinnaanerat arlaatigut ajornakusuulersissinnaavaa, sianiginiagassammi arlaqarmata. Ilaatigut nalunaarsuiffeqarnermut tunaartarisassat pillugit Danmarkimi Datatilsynimit oqaaseqaateqartoqarsimassaaq.

3. Akornutaasinnaasut killiliisinnaasulluunniit pineqartut inuk pillugu paasissutissanut inatsisip (Akornutaasinnaasut UKA2015/24) peqqussutikkut Kalaallit Nunaannut atuutsilerneqarneratigut pisinnaasukkut pinngitsoortinneqarsinnaappat?

Inunnik paasissutissaateqarfik pillugu inatsisip akuersissutigineqarnerata kingunerissavaa inunnik paasissutissaateqarfik pillugu inatsimmi malittarisassat malillugit whistleblowerimik aaqqissuussinermik pilersitsisoqarnera. Matumani aaqqissuussinermik Datatilsynimut nalunaarutiginnittarnermik akuersissuteqartarnermillu malittarisassat.

Whistleblowerimik aaqqissuussinikkut inunnik paasissutissaateqarfik pillugu inatsimmi suliarinnittarnermut piumasaqaatit nalinginnaasut naammassineqarsimassapput, soorluttaaq aaqqissuussinerup teknikikkut aaqqissuussaanerani isumannaallisaanermut piumasaqaatit inunnik paasissutissanik digitalimik suliarinnittarnerniittut naammassineqarsimassasut. Taamatuttaaq inunnik paasissutissat isumannaatsumik suliarineqartarnissaannut piumasaqaatit, tassa aaqqissuussineq oqartussaasut taamatullu suliffeqarfiit avataannut aalaakkaasumik inissineqassappat taamatuttaaq nalunaarsorneqartut pisinnaatitaaffiinik pitsaaneruseqarsumik isumannaallisaanissaq eqqarsaatigalugu.

Inunnik paasissutissaateqarfik pillugu inatsit malillugu nalunaarutiginnittarnermi periaatsit eqqarsaatigalugit nalunaarsuisarnermut tunaartarisassat suliarineqartarnerat pillugu nalunaarsuisarnermut inatsisini maannakkut piumasaqaataasunit eqaannerunissaat naatsorsuutigineqarpoq. Kisiannili killeqanngitsumik whistleblowerimik aaqqissuussinermik pilersitsisoqarsinnaalissanani.

4. Inuk pillugu paasissutissanut inatsimmut Kunngip peqqussutaata Kalaallit Nunaanni Namminersorlutik Oqartussani atortuulersinneqarnissaa pillugu Inatsisartut aalajangiiffigisassaattut siunnersuummik Naalakkersuisut saqqummiussinerminni (UKA2015/24), kinaassutsimik ersersitsisuunngitsumik ilisimasamik ingerlatitseeqqiisinnaanermut aaqqissuussanik pilersitsisinnaanermut Kalaallit Nunaanni suliffeqarfinnut pisortanullu periarfissiisunik malittarisassiuussinissamut aalajangiiffigisassatut siunnersuut PIVIUSUNNGORTEREERAAT Naalakkersuisunit nalilerneqarpa?

Naalakkersuisut aalajangiiffigisassatut siunnersuut (UKA2015/117) imatut paasivaat sulissutigineqassasooq Kalaallit Nunaanni whistleblowerimik aaqqissuussinernik pilersitsinissamut periarfissiilluni malittarisassanik aalajangersaasoqarnissaa.

Naalakkersuisut isumaqarput nalunaarsuisarnermut inatsisini maannakkut malittarisassat periarfissiisut Kalallit Nunaanni whistleblowerimik aaqqissuussinernik pilersitsisoqarnissaanut (allakkami matumani apeqqutinut 1-imut aamma 2-mut akissutigineqartut innersuussutigineqarput). Kisiannili Naalakkersuisut isumaqarputtaaq inunnik paasissutissaateqarfik pillugu inatsisip atuutilersinneratigut whistleblowerimik aaqqissuussinerup pilersinneqarneratigut akuersissuteqartarnermut suleriaatsit arlaatigut eqaallisarneqassasut.

Imaluunniit- soorlu Transparency Greenland siusinnerusukkut ataatsimiititaliamut saaffiginninnermini taamak naliliisimasoq – kinaassutsimik ersersitsisuunngitsumik ilisimasamik ingerlatitseeqqiisinnaanermut nunami taamak ikitsigisunik innuttaqartumi aaqqissuussineq ima pisariutigisoq allaat tamanna immikkut ittumik inatsisiliuuttariaqarluni, taamaalillunilu inatsisunik allanik pilersitsisoqartariaqartoq Naalakkersuisut naliliippat?

Suliassaqarfik annertunerusumik ingerlatsivimmi suliffeqarfiniluunniit namminersortuni misiligarneqarsimangitsoq pineqarpoq. Kalaallit Nunaanni Namminersorlutik Oqartussani sulisunut whistleblowerimik aaqqissuussinermik pilersitsinikkut misilittagarineqalersut pissapput ilaatigut inuiaqatigiinni allaffissornermut aningaasaqarnermullu tunngatillugu pissutsinik naleqqussaanissaq siunertaralugu. Tamanna suliassaqarfiuvoq aaqqissuussamik misilittagaqariartorneq ilutigalugu ingerlaavartumik ineriartortinneqarusuttoq aamma tassunga inatsisitigut periarfissanik nalilersuiffiusarniartoq.

Inatsisinut Ataatsimiititaliap maluginiarsimavaattaq Naalakkersuisut UPA 2015/117-ip siullermeerneqarnerani akissuteqaamminni oqaatigisimammassuk Kalaallit Nunaanni Namminersorlutik Oqartussanut sulisunut whistleblowerimik aaqqissuussinermut tunngavissat oqartussaasunut soqutigisaqatigiiffinnullu aamma allanut tusarniaassutigineqarsimammata. Tamanna tunngavigalugu Inatsisinut Ataatsimiititaliap Naalakkersuisut kissaateqarfagai apeqqutit uku akissuteqarfigeqqullugit:

5. Kalaallit Nunaanni Namminersorlutik Oqartussani sulisunut kinaassutsimik ersersitsisuunngitsumik ilisimasamik ingerlatitseeqqiisinnaanermut aaqqissuussamik pilersitsinissamik suliaqarneq sumut killippa, kiisalu qaqugu aaqqissuussap atuutilernissaa naatsorsuutigineqarpa?

"Kalaallit Nunaanni Namminersorlutik Oqartussani whistleblowerimik aaqqissuussineq pillugu tunaartarisassat" 1. maj 2015-imeersut tunngavigalugit isertarfimmik saaffiginnissutinik tigooraavissamik ineriartortitsisoqarsimavoq. Kalaallit Nunaanni Namminersorlutik Oqartussani sulisunut whistleblowerimik aaqqissuussineq 2015-ip naalernerani atuutilissasoq naatsorsuutigineqarpoq.

Inussiarnersumik inuulluaqqusillunga


Vittus Qujaukitsog